

PABLO NAAJIONEE FILEMÓNCUARA

Pablo saruhuatasacari Filemón

¹¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaa pa Jiyaniijia poonijona quia quiniuucua. ²Canaara quia saruhuatare pa rimiatucua Apia, Arquiponio, jaarajaa pa Jiyaniijiajiniji pohuatanani. Canaara quia saruhuatarehua parta Pueyaso pueya maanu, noo pojori, quia tiajinia rerejoquiaa Pueyaso secojonuunuraje. ³Pa Que Pueyaso, pa Jiyaniijia Jesucristonio, nojori cuaara cumaquiiria niajaniya, jiyanoojiaca nojori quiniuucua. Nojori cuaara cajitiiria nioojiajuhuaj, juhuajaniya nia quiniuria.

Filemón paniniujiniji pohuatasano, Pueyasocua na tiuuniujinijinio

⁴Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. ⁵Janiyari naa sequequiaa Pueyasoni, quiajaniyajini-ji cua tojinuucua taa quia paniquiaa pa Jiyaniijia Jesuni, puetunu na pueyajanaa-nio. Quiaanaari seetanujuanaa pa Jiyaniijiaacua tiuujia. Janiyari cunora quia timitiaani. ⁶Janiyari quiocuara secojoquiaani, seetanujuanaa quiarta Pueyaso pueya jiyanoojia quia quiniuria, nojoricua quia taraajenura. Naacujitij, nojori quia cumaquishacari, quiaari

maatia niishiniutianiya puetunu quioojia-jinia quia jiitiasanojuanaa Jesucristojiniji, Jesucristoocua tiuujia quia quiniuucua. ⁷Parta Pueyaso pueya panijia quia quiniuucua, quiaanaari nojori cumanjia-canu, nojoricua quia taraajesacari. Naa cua niishishacari quia miishanoinijitij, janiyari coojia cumanjiaacuanujuhuaj. Cunora, shuquiriaatia quiyaniija.

Pablo sequesacari Filemón, nojuaja jiyanooniuhuaa tama na seru Onésimojuaaja

⁸Jesucristo jiyaramiquishano pueyano cua quiniuucua, cua naata sequenu quiajaniya quia miiniuria cua sequesano. ⁹Naajaa, majaari cua sequenu paniniu quiajaniya juhua quia jiyaniijia. Saniniuujia, panijia quia quiniuucua, janiyari quia sequenu paniyani quia miiniuria nio cua sequesano quiarijia. Jesucristojiniji cua pohuatanuucua, janiyari quiarijia moronucua quiyani тариуаа saaquiano. Naajaa, quia rupena Pablo cua quiniuucua, cua tojiri Filemón-naa. ¹⁰Cucua quia taraajere quenaaja. Quia nenecojianijia cua niyanuniyojua Onésimooacara. Nojuajaari seetanujua-naa juhua quiyamura quiriucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

¹¹Tarija, Onésimoori sesa seru quiquiaari quiaara. Quiarijia saniniuujia, nojuajaari na naata maninia quiniu

quiara, taa quiria na quiyacuaani.

¹²Janiyari quiarijia quiocua jiyaroya quiyanuni. Quiocua na maserohua quia timiniutia, taa quia masequiaa janiyacuaani. ¹³Moronucua cua quishacari Jesucristo rupaa cua pohuatunuucua, janiyari niyaja na jiyojetenu paniriquiaa juucuaani, na naacunura janiya quia niti.

¹⁴Naajaa, majaari naa cua miiniu paniniu quiriquiaa jiyasohuaja, coteenu cua nequesotaaquishacari quiajaniya. Janiya jaara quia sequereni janiya niya na jiitianutaniya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miiniu paniyani. Cunora, janiyari na jiyaroya quiocuani. ¹⁵Onésimo jiyoteeri quiocuaji rupatecanu rupaquiriaja, quiarijia quiara na quiniuhuara pueyaracaanu cutara.

¹⁶Quiarijiani, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiarijiani, Jesuucua tiuujia na quishacarijiuhuaj. Nojuajaari jiyanoherua cua panishano parta Pueyaso pueyano. Naajaa, quiaa cuaara jiyanoherua na panijia quiiria socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

¹⁷Naacuajitij, janiya jaara seetanujua-naa quiarta Pueyaso pueyano quiri quiarani, Onésimo tiuquishacari quiocua, nojuaja quia miiri maninia, taa quia miiquiaacuaa janiyani. ¹⁸Onésimo jaara sesa miiquiaari quiajaniya, jaara quia casaa nohuasequiaarijiuhuaj, nojuaja quia jiyanoori. Saniniuujia cucua quia tiuutiare puetunu sesa na miishanojuanaa quiajaniya. ¹⁹Janiyacua saniniuujia cua

cumaneeacajiniji quia niqutioreni puetunu sesa na miishanojinijijianaa quiajaniya. Janiyari Pabloni. Janiyari tama cua juaashiquiatajaaja nio naajiya-ni, cua sequesanoocua quia tiuuniuria. Janiyari quia niishitiniu panijajuhuaj, Jesucristojiniji cua pohuatasanoocua quia tiuushacari, quiaacuajaari pueyaracaanu quijiaara jatanishaaquiaari. Naacuajitij, cua naata sequenu quiajaniya, cua serura quia quiniuriajuhuaj. Naajaa, janiyari saaja quia sequeyani Onésimoocua quia taraajenura. ²⁰Naa quiria quia miiri quenaaja, mariyata Jesuucua tiuujiaa pa quiniuucua, cua panishano Filemónnaa. Quiaa jaara Onésimo jiyanoori, Cristo panijia quia quiniuucua, quiaari seetanujuanaa coojia cumanijianutaniya.

²¹Janiyari naa quiocuara naajiyaani, cua niishishacari quiaacuajaari cua sequesano miiniutianiya. Janiyari niishiyajaanihuaj, quiaari socua maninia na miiniutianiya cua sequesanojiniji.

²²Naajuhuaj, janiyari juhuacarijia quia sequeyani, cua maquejara quia jeenucua-re cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuquitiniutianiya, niaata cua quiniuria.

Pablo sequesano na naajio na tucuatasaacari

²³Epafrasri cua sequeree cua saruhuata-nura niajaniya. Nojuajaari cuarta moronucuajuhuaj, Jesucristojiniji canaa pohuatunuucua. ²⁴Jaarajaaja cuata Jesucristojiniji pohuatanaa pueyari nia saruhuataajuhuaj. Nojoriiri Marco, Aristarco, Demas, Lucasnio.

²⁵Pa Jiyaniijia Jesucristo cuaara cumaquiiria niajaniya.